

睢水

瓠子水

汶水

泗水

沂水

洙水



水經注釋卷二十四



仁和趙一清誠夫錄

睢水

瓠子水

汶水

睢水出梁郡鄆縣

睢水出陳畱縣西浪蕩渠東北流地理志曰睢水首受陳畱浚儀浪蕩水也經言出鄆非矣又東逕高陽故亭

北俗謂之陳畱北城非也蘇林曰高陽者陳畱北縣也

按在畱故鄉聚名也有漢廣野君廟碑延熹六年十二

月雍邱令董生

何氏曰隸釋作董之乃董督之義一清按斯言未安

仰餘徽于千

載遵茂美于絕代命縣人萇照為文用章不朽之德其

略云輟洗分餐咨謀帝猷陳鄭有涿鹿之功海岱無牧
 野之戰大康華夏綏靖黎物生民以來功盛莫崇今故
 宇無聞而單碑介立矣陳留風俗傳曰酈氏居于高陽
 沛公攻陳留縣酈食其有功封高陽侯全氏曰按食其
 是因其子高有酈峻字文山官至公府掾大將軍商有
 梁侯亦而誤功食邑于涿故自陳留徙涿縣有鉞亭鉞鄉建武二年
 世祖封王常為侯國也一清按王常封山桑侯不聞在
 陳留也豈由鄉亭進封而史傳
 失之乎 睢水又東逕雍邱縣故城北縣舊杞國也殷湯周
 武以封夏后繼禹之嗣楚滅杞秦以為縣圜稱曰縣有
 五陵之名故以氏縣矣城內有夏后祠昔在二代享祀

不輟秦始皇圍築其表為大城而以縣焉睢水又東水
 積成湖俗謂之白羊陂陂方四十里右則姦梁陂水注
 之其水上承陂水東北逕雍邱城北又東分為兩瀆謂
 之雙溝俱入白羊陂陂水東合洛架水口水上承汜水
 謂之洛架水東南流入于睢水睢水又東逕襄邑縣故
 城北又東逕雍邱城北睢水又東逕寧陵縣故城南故
 葛伯國也玉莽改曰康善矣歷鄆縣北二城南北相去
 五十里故經有出鄆之文城東七里水次有單父令楊
 彥尚書郎楊禪字文節兄弟二碑漢光和中立也
 又東過睢陽縣南

睢水又東逕橫城北春秋左傳昭公二十一年樂大心
 豐愆華輕禦華向于橫杜預曰梁國睢陽縣南有橫亭
 今在睢陽縣西南世謂之光城蓋光橫聲相近習傳之
 非也睢水又逕新城北即宋之新城亭也春秋左傳文
 公十四年公會宋公陳侯衛侯鄭伯許男曹伯晉趙盾
 盟于新城者也睢水又東逕高鄉亭北又東逕亳城北
 南亳也即湯所都矣睢水又東逕睢陽縣故城南周武
 王封微子啟于宋以嗣殷後為宋都也一清按尚書序
 史記周本紀宋
 微子世家皆云周公承成王命昔宋元君夢江使乘輜
 以封微子于宋注云武王誤也車被繡衣而謁於元君元君感衛平之言而求之于泉

陽男子余且獻神龜於此矣秦始皇二十二年以為碭

郡漢高祖嘗以沛公為碭郡長天下既定五年為梁國

全氏曰閭若璩云睢陽是梁都而班志置之第八其第
 一縣乃碭也按秦立碭郡則碭縣乃秦之治所及漢改
 治睢陽孟堅或仍秦地
 圖之舊而未及改正耳文帝十二年封少子武為梁王

太后之愛子景帝寵弟也是以警衛貂侍飾同天子藏

珍積寶多擬京師招延豪傑士咸歸之長卿之徒免官

來遊廣睢陽城七十里大治宮觀臺苑屏榭勢並皇居

其所經構也役夫流唱必曰睢陽曲創傳由此始也城

西門即寇先鼓琴處也先好釣居睢水傍宋景公問道

不告殺之後十年止此門鼓琴而去宋人家奉事之

南門曰盧門也春秋華氏居盧門里叛杜預曰盧門宋城南門也司馬彪郡國志曰睢陽縣有盧門亭城內有高臺甚秀廣巍然介立超焉獨上謂之蠡臺亦曰升臺焉當昔全盛之時故與雲霞競遠矣續述征記曰迴道似蠡故謂之蠡臺非也余按闕子稱宋景公使工人爲弓九年乃成公曰何其遲也對曰臣不復見君矣臣之精盡於弓矣獻弓而歸三日而死景公登虎圈之臺援弓東面而射之矢踰于西霜之山

朱氏謀埠箋曰藝文類聚作孟霜之山

集于彭城之東餘勢逸勁猶飲羽于石梁然則蠡臺卽是虎圈臺也蓋宋世牢虎所在矣晉太和中大司馬桓

溫入河命豫州刺史袁真開石門鮮卑堅戍此臺真頓甲堅城之下不果而還蠡臺如西又有一臺俗謂之女郎臺臺之西北城中有涼馬臺臺東有曲池池北列兩釣臺水周六七百步蠡臺直東又有一臺世謂之雀臺也城內東西道北有晉梁王妃王氏陵表並列二碑碑云妃諱粲字女儀東萊曲城人也齊北海府君之孫司空東武景侯之季女咸熙元年嬪于司馬氏泰始二年妃于國太康五年薨營陵于新蒙之

朱氏謀埠箋云太此下疑有脫誤

康九年立碑東卽梁王之吹臺也基階礎尙在今建追明寺故宮東卽安梁之舊地也廣周五六百步水列

釣臺池東又有一臺世謂之清冷臺北城憑隅又結一池臺晉灼曰或說平臺在城中東北角亦或言兔園在平臺側如淳曰平臺離宮所在今城東二十里有臺寬廣而不甚極高俗謂之平臺余按漢書梁孝王傳稱王以功親爲大國築東苑方三百里廣睢陽城七十里大治宮室爲複道自宮連屬于平臺三十餘里複道自宮東出楊門之左楊門卽睢陽東門也連屬于平臺則近矣屬之城隅則不能是知平臺不在城中也梁王與鄒枚司馬相如之徒極游于其上故齊隨郡王山居序所謂西園多士平臺盛賓鄒馬之客咸在伐木之歌屢陳

是用追芳昔娛神遊千古故亦一時之盛事謝氏賦雪亦曰梁王不悅遊于兔園今也歌堂淪宇律管埋音孤基塊立無復曩日之望矣城北五六里便得漢太尉橋元墓冢東有廟卽曹氏孟德親酌處操本微素嘗候于元元曰天下將亂能安之者其在君乎操感知已後經元墓祭云操以頑質見納君子士死知己懷此無忘又承約言徂沒之後路有經由不以斗酒隻雞過相沃醑車過三步腹痛勿怨雖臨時戲言非至親篤好胡肯爲此辭哉悽愴致祭以申宿懷冢列數碑一是漢朝羣儒英才哲士感橋氏德行之美乃共刊石立碑以示後世

一碑是故吏司徒博陵崔烈廷尉河南吳整等以為至德在己揚之由人苟不皦述夫何考焉乃共勒嘉石昭明芳烈一碑是隴西枹罕北次陌碭守長隲為左尉漢陽獮道趙馮孝高以橋公嘗牧涼州感三綱之義慕將順之節以為公之勲美宜宣舊邦乃樹碑頌以昭令德光和元年主記掾李友字仲僚作碑文碑陰有右鼎文建寧三年拜司空又有中鼎文建寧四年拜司徒又有左鼎文光和元年拜太尉鼎銘文曰故臣門人相與述公之行咨度體則文德銘于三鼎武功勤于征鉞書于碑陰以昭光懿又有鉞文稱是用鏤石假象作茲征鉞

軍鼓陳之于東階亦以昭公之文武之勲焉

隸辨曰按後漢書橋

元傳光六年卒蔡邕集太尉橋公碑有二俱云光七年薨水經注謂是碑作于光元年恐誤也其載鼎銘文云文德銘于三鼎云云乃是蔡邕橋公碑中語非鼎銘文也邕有東中西鼎三銘見于集中又有黃戊銘所云鉞文稱是用鏤石假象作茲征鉞亦邕銘中語而謂碑文為李友所作豈後人搜采邕集誤入他人之文耶

廟南列二石柱柱東有二石羊羊北有二石虎廟前

東北有二石駝駝西北有二石馬皆高大亦不甚雕毀

惟廟頽構粗傳遺墉石鼓仍存鉞今不知所在睢水於

城之陽積而為逢洪陂陂之西南有陂又東合明水水

上承城南大池池周千步南流會睢謂之明水絕睢注

渙睢水又東南流歷于竹圃水次綠竹蔭渚菁菁實望

世人言梁王竹園也

太平御覽引水經注曰睢陽有隕石水一名漆溝左傳云隕石于宋

五隕星也故老云此水有時竭涸五石存焉故名隕石水墜處為津今本無之睢水又東逕穀

熟縣故城北睢水又東蘄水出焉睢水又東逕栗縣故

城北地理志曰侯國也王莽曰成富睢水又東逕太邱

縣故城北地理志曰故敬邱也漢武帝元朔三年封魯

恭王子節侯劉政為侯國

朱氏謀璋箋曰漢書王子侯表魯共王子政封瑕邱地理

志瑕邱屬山陽郡而敬邱即太邱屬沛郡注似誤引也

一清按酈氏所言未可非也地理志山陽郡瑕邱下不

云侯國沛郡敬邱下云侯國侯表中無敬邱侯安知道元所見之本之不作敬邱乎漢明帝更從

今名列仙傳曰仙人文賓邑人賣鞞履為業以正月朔

日會故嫗于鄉亭西社教令服食不老即此處矣睢水

又東逕芒縣故城北漢高帝六年封酈跖為侯國王莽

之傳治也世祖改曰臨睢城西二里水南有豫州從事

皇毓碑殞身州牧陰君之罪時年二十五臨睢長平與

李君二千石承輪氏夏文則高其行而悼其殞州國咨

嗟旌閭表墓昭序令德式示後人城內有臨睢長左馮

翊王君碑善有治功累遷廣漢屬國都尉吏民思德縣

人公府掾陳盛孫郎中倪定興劉伯卿等共立石表政

以刊遠績縣北與碭縣分水有碭山芒碭二縣之間山

澤深固多懷神智有仙者涓子主柱並隱碭山得道漢

高祖隱之呂后望氣知之即於是處也京房易侯曰何

以知賢人隱師曰視四方常有
大雲五色具而不雨其
下賢人隱矣

又東過相縣南屈從城北東流當蕭縣南入于睢

一清按睢水豈

可云入睢乎漢志云睢水東至取慮入泗注云睢水東南流入泗謂之睢口經止蕭縣非也所謂得其一而亡其二矣獲水經云又東過蕭縣南睢水北流注之此篇經文入于睢之睢蓋別水支流所匯而非首受菴蕩渠之睢道元故以出入迴環更相通注調停之

相縣故宋地也秦始皇二十三年以為泗水郡漢高帝

四年改曰沛郡治此漢武帝元狩六年封南越桂林監

居翁為侯國曰相成也

一清按史漢表並作湘成索隱曰在堵陽然則非沛郡之相

王莽更名之吾符縣曰吾符亭也睢水東逕石馬亭亭

西有漢故伏波將軍馬援墓睢水又東逕相縣故城南

宋共公之所都也國府園中猶有伯姬黃堂基堂夜被

火左右曰夫人少避伯姬曰婦人之義保傅不具夜不

下堂遂遇火而死斯堂即伯姬熾死處也城西有伯姬

冢昔鄭渾為沛郡太守於蕭相二縣與陂堰民賴其利

刻石頌之號曰鄭陂睢水又左合白溝水水上承梧桐

陂陂側有梧桐山陂水西南流逕相城東而南流注于

睢睢盛則北流入于陂陂溢則西北注于睢出入迴環

更相通注故經有入睢之文睢水又東逕彭城郡之靈

壁東東南流漢書項羽敗漢王于靈壁東即此處也又

云一清按下有脫文

東通穀泗服虔曰水名也在沛國相界未

詳睢水逕穀熟兩分睢水而為蘄水故二水所在枝分

通謂兼稱穀水之名蓋因地變然則穀水即睢水也又

云漢軍之敗也睢水為之不流睢水又東南逕竹縣故

城南地理志曰王莽之篤亭也李奇曰今竹邑縣也睢

水又東與渾湖水合水上承留邱縣之渾陂南北百餘

里東西四十里東至朝解亭西屆彭城留邱縣之故城

東王莽更名之曰善邱矣其水自陂南系于睢水睢水

又東南八丈故溝水注之水上承蘄水而北會睢水又

東逕符離縣故城北漢武帝元光四年封路博德為侯

國沈氏曰是元狩四年封又按漢表曰邳離屬朱虛此從史記年表

王莽之符合也睢

水又東逕臨淮郡之取慮縣故城北昔汝南步遊張少

失其母及為縣令遇母于此乃使良馬躡躡輕軒罔進

顧訪病姬乃其母也誠願宿憑而冥感昭徵矣睢水又

東合烏慈水水出縣西南烏慈渚潭漲東北流與長直

故瀆合瀆舊上承蘄水北流八十五里注烏慈水烏慈

水又東逕取慮縣南又東屈逕其城東而北流注于睢

睢水又東逕睢陵縣故城北漢武帝元朔元年封江都

易王子劉定為侯國一清按索隱曰表在淮陵王莽之睢陸也睢水

又東與潼水故瀆會舊上承僮縣西南僮陂東北流逕

僮縣故城北又東北逕睢陵縣下會睢水又東南流逕下相縣故城南高祖十二年封莊侯冷耳為侯國應

劭曰下相水出沛國相縣故此加下也然則下相又是

睢水之別名也一清按漢志下相縣應劭曰相水出沛國故加下不名下相水道元誤矣東

南流入于泗謂之睢口經止蕭縣非也所謂得其一而

亡其二矣

瓠子河出東郡濮陽縣北河

縣北十里即瓠河口也尚書禹貢雷夏既澤雝沮會同

爾雅曰水自河出為雝許慎曰雝者河雝水也一清按道元敘

雷澤甚詳而濼沮甚略殆以不見班志故耶括地志曰雷夏澤在濮州雷澤縣郭外西北濼沮二水在澤西北

平地元和志云去縣十四里則明有其處矣曾彥和則引爾雅水自河出為雝許慎曰河雝水在宋濼之下流入于睢水雝水其沮水與晁以道亦引河出為濼濟出為濼求之于韻沮有濼音胡肫明非之以為汜睢皆出豫入徐於兗無涉又云濼沮皆濟水所出而河不與焉故鄭康成欲破周禮職方兗州其浸盧維為雷雝通典不從以濟陽盧縣自有盧水高密莒縣自有維水胡肫明又非之以周時徐并于青兗不得越青而東有維濟陽之盧水古不著名周禮多古字霽似盧雝似維也且裴駟史記集解引康成說云雍水沮水相觸而合入此澤中閻百詩曰下一觸字鄭蓋以目驗知之惟雷澤之下流未知何往大抵不南注濟則北注濮濮亦終歸于濟也二水為禹貢著名之水不容不詮要在雷澤之傍者近是道元注甚鶻突且移而被之岐西之雍沮專門名家之學踈繆若此真卷中一話柄也

暨漢元光之年河水南決漂害民居武帝元封二年上使汲仁郭昌發卒數萬人塞瓠子

決河于是上自萬里沙還臨決河沈白馬玉璧令羣臣

將軍以下皆負薪填決河上悼功之不成乃作歌曰瓠

子決兮將奈何

一清按漢書此下有浩浩湯湯慮殫為河句方叶韻

殫為河兮地

不寧功無已時兮吾山平吾山平兮巨野溢魚沸鬱兮

柏冬日正道弛兮離常流蛟龍騁兮放遠遊歸舊川兮

神哉沛不封禪兮安知外皇謂河公兮何不仁泛濫不

止兮愁吾人齧桑浮兮淮泗滿久不返兮水唯緩一日

河湯湯兮激潺湲北渡迴兮迅流難牽長菱兮湛美玉

一清按漢書此下有河公許兮薪不屬薪不屬兮衛人罪燒蕭條兮噫乎何以禦水屬字與玉字叶隕竹

林兮礎石菑宣防塞兮萬福來於是卒塞瓠子口築宮

於其上名曰宣房宮故亦謂瓠子堰為宣房堰而水亦

以瓠子受名焉平帝已後未及修理河水東浸日月彌

廣永平十二年顯宗詔樂浪人王景治渠築堤起自滎

陽東至千乘一千餘里景乃防遏衝要疏決壅積瓠子

之水絕而不通唯溝瀆存焉河水舊東流逕濮陽城東

北故衛地帝顓頊之墟昔顓頊自窮桑徙此號曰商邱

或謂之帝邱本陶唐氏火正闕伯之所居亦夏伯昆吾

之都殷之相土又都之故春秋傳曰闕伯居商邱相土

因之是也

全氏曰帝邱豈商邱耶闕伯之商邱在睢陽非帝邱也王伯厚曰此蓋出于帝王世紀之

繆一清按寰宇記云衛南縣東北七十里土山村即衛古帝邱衛成公遷于此酈氏以商邱當之真屬臆說衛

成公自楚邱遷此秦始皇徙衛君角于野王置東郡治

濮陽縣濮水逕其南故曰濮陽也沛公守濮陽環之以水張晏曰依河水自固

一清按漢書謂章邯守濮陽耳非沛公也所引張晏註亦抄變

其詞元文是張晏曰依河水以自環繞作壘也又東逕鹹城南春秋僖公十三

年夏會于鹹杜預曰東郡濮陽縣東南有鹹城者是也

瓠子故瀆又東逕桃城南春秋傳曰分曹地自洸盡曹

地也一清按傳文是分曹地自洸以南東傳于濟今鄆城西南五十里有桃

城或謂之洸也一清按方輿紀要桃城亦曰姚城因姚墟而名援神契舜生姚墟應劭曰姚墟

與雷澤相近世稱爲姚城是也瓠瀆又東南逕清邱北春秋宣公十二年經書楚滅蕭晉人宋衛曹同盟于清邱京相璠曰在

今東郡濮陽縣東南三十里魏東部都尉治

東至濟陰句陽縣爲新溝

瓠河故瀆又東逕句陽縣之小成陽城北側瀆帝王世

紀曰堯葬濟陰成陽西北四十里是爲穀林墨子以爲

堯堂高三尺土階三等北教八狄道死葬蛩山之陰山

海經曰堯葬狄山之陽一名崇山二說各殊以爲成陽

近是堯冢也余按小成陽在成陽西北半里許實中俗

嘑以爲囚堯城土安蓋以是爲堯冢也瓠子北有都關

縣故城縣有羊里亭瓠河逕其南爲羊里水蓋資城地

而變名由經有新溝之異稱矣黃初中賈逵爲豫州刺

史與諸將征吳于洞浦有功魏封逵爲羊里亭侯邑四

百戶卽斯亭也俗名之羊子城非也蓋韻近字轉耳又
東右會濮水枝津水上承濮渠東逕鉏邱城南京相璠
曰今濮陽城西南十五里有沮邱城六國時沮楚同音
以爲楚邱非也又東逕浚城南西北去濮陽三十五里
城側有寒泉岡卽詩所謂爰有寒泉在浚之下世謂之
高平渠非也京相璠曰濮水故道在濮陽南者也又東
逕句陽縣西句瀆出焉濮水枝渠又東北逕句陽縣之
小成陽城東故垂亭西而北入瓠河地理志曰濮水首
受沛于封邱縣東北至都關入羊里水者也又按地理
志山陽郡有都關縣今其城在廩邱城西考地志山陽
廩邱俱屬濟陰則都關無隸山陽理又按地理志邠都
亦是山陽之屬縣矣而京杜考地驗城又並言在廩邱
城南推此而論似地志之誤矣或亦疆理參差所未詳
瓠瀆又東逕垂亭北春秋隱公八年宋公衛侯遇于犬
邱經書垂也京相璠曰今濟陰句陽縣小成陽東五里
有故垂亭者也

又東北過廩邱縣爲濮水

瓠河又左逕雷澤北其澤藪在大成陽縣故城西北一
十餘里昔華胥履大蹟處也其陂東西二十餘里南北
一十五里卽舜所漁也澤之東南卽成陽縣故史記曰

武王封弟季載于成應劭曰其後乃遷於成之陽故曰成陽也地理志曰成陽有堯冢靈臺今成陽城西二里有堯陵陵南一里有堯母慶都陵於城為西南稱曰靈臺鄉曰崇仁邑號修義皆立廟四周列水潭而不流水澤通泉泉不耗竭至豐魚笱不敢採捕前並列數碑栝柏數株檀馬成林二陵南北列馳道徑通皆以磚砌之尙修整堯陵東城西五十餘步中山夫人祠堯妃也石壁堦墀仍舊南西北三面長櫟聯蔭扶踈里餘中山夫人祠南有仲山甫冢冢西有石廟羊虎傾低破碎略盡於城為西南在靈臺之東北按郭緣生述征記自漢迄

晉二千石及丞尉多刊石述敘堯卽位至永嘉三年二千七百二十有一載記于堯妃祠見漢建寧四年五月一清按四年當作五年成陽靈臺碑云建寧五年五月造後漢書靈帝紀以夏五月己巳始改建寧五年為熹平元年故建寧無五年也造碑時尚未知有改元事故碑題仍稱五年酈以紀元建寧無五年遂作四年豈得其實乎抑或後人妄更未可知也 成陽令管遵所立碑文云堯陵北仲

山甫墓南二冢間有伍員祠晉大安中立一碑是永興中建今碑祠並無處所又言堯陵在城南九里中山夫人祠在城南二里東南六里堯母慶都冢堯陵北二里

有仲山甫墓考地驗狀咸為踈僻蓋聞疑書疑耳一清按隸

釋有濟陰太守孟郁修堯廟碑威宗永康元年又帝堯碑靈帝熹平四年又成陽靈臺碑建寧五年三碑俱云

水經有今本祇有漢建寧四年五月成陽令管遵所立碑即成陽靈臺碑也上二碑無之蓋缺矣洪氏迺曰成陽靈臺碑篆額靈帝建寧五年立與堯廟二碑在成陽皆有所漢綴其祀至亡新而蠲於是廷尉仲定奏請與治郡守審晃縣令管遵各遣大掾助成之案兩漢地志濟陰成陽有堯冢靈臺不明言靈臺為堯母冢也章帝紀元和二年使使者祠唐堯於成陽靈臺注引郭緣生述征記曰成陽有堯陵陵南一里有堯母慶都陵稱曰靈臺據此則與碑合靈臺有堯母冢明矣集古錄曰按皇覽云堯冢在濟陰城陽呂氏春秋云堯葬穀林皇甫謐云穀林即成陽也然自史記地志及水經諸書皆無堯母葬處惟見于此碑蓋亦葬成陽也而諸書俗本多為城陽獨此碑為成陽當以碑為正金石錄跋尾云成陽屬今雷澤歐陽公以為自史記地志及水經諸書皆無堯母葬處余按班固西漢劉昭東漢書地理志皆曰成陽有堯冢靈臺而東漢志章帝元和二年東巡狩將至泰山道使使者奉一太牢祠帝堯于濟陰成陽靈臺與章帝紀所載正同帝紀章懷太子注引郭緣生述征記云成陽東南有堯母慶都墓上有祠廟堯母陵俗亦

名靈臺文母水經注今成陽城西二里有堯陵南一里有堯母慶都陵於城為西南稱曰靈臺蓋兩漢史所載似以靈臺為堯冢惟此碑與述征記水經乃直指為堯母冢爾然水經云在成陽西南而述征記云在東南余為淄州同官李蕘雷澤人云冢正在城西南蓋述征記誤路史辨帝堯冢曰堯冢在濟陰成陽堯母靈臺在南歐陽文忠公集古錄言靈臺碑以為史記地志水經諸書皆無堯母葬處粵稽地志及范氏志水經注言堯陵慶都陵明白若此惡得云無耶然述征記云在成陽東南今之所識乃在城陽西南四十里穀林則古今疆場相出入有不同者郭氏所記乃小成陽小成陽在成陽西北五十里隸于河南有山曰成陽穀林在其下小成陽以山得名乃堯葬母所在有堯冢故各文忠跋謂俗本多作城陽獨此碑為成陽夫成陽與城陽正自二所成陽隸濟陰乃古之成陽王封母弟于成後遷于成之陽遂曰成陽而城陽乃漢齊悼惠王之子章所食之國今之兗州是矣雷澤西南十許里有小山孤立峻上不得混為一也

亭亭傑峙謂之歷山山北有小阜南屬迤澤之東北有

陶墟緣生言舜耕陶所在墟阜聯屬濱帶瓠河也鄭元曰歷山在河東今有舜井皇甫謐或言今濟陰歷山是也與雷澤相比余謂鄭元之言為然故揚雄河東賦曰登歷觀而遙望兮聊浮游于河之巖今雷首山西枕大河校之圖緯於事為允士安又云定陶西南陶邱舜所陶也不言在此緣生為失瓠河之北即廩邱縣也王隱晉書地道記曰廩邱者春秋之所謂齊邑矣實表東海者也竹書紀年晉烈公十一年田悼子卒田布殺其大夫公孫孫公孫會以廩邱叛于趙田布圍廩邱翟角趙孔屑韓師救廩邱及田布戰于龍澤田布敗逋是也瓠

河與濮水俱東流經所謂過廩邱為濮水者也縣南瓠

北有羊角城春秋傳曰烏餘取晉羊角遂襲我高魚天大雨自竇入介其庫登其城尅而取之者也京相璠曰衛邑也今東郡廩邱縣南有羊角城高魚魯邑也今廩邱東北有故高魚城俗謂之交魚城謂羊角為角逐城皆非也瓠河又逕陽晉城南史記蘇秦說齊曰過衛陽

晉之道

全氏曰按胡三省曰所謂衛陽晉者以魏境有陽晉故稱衛陽晉以別之史記秦取魏陽晉是也

也經于亢父之險者也今陽晉城在廩邱城東南一十餘里與都關為左右者也張儀曰秦下甲攻衛陽晉大

關天下之匈徐廣史記音義云關一作開

清按此十字注中注

東之亢父則其道矣瓠河之北又有郟都城春秋隱公三年郟侵衛京相璠曰東郡廩丘縣南三十里有故郟都城地理志曰山陽鄉也一清按鄉當作縣褚先生曰漢封金

安上為侯國王莽更名之曰城穀者也按褚表金安上封都成侯漢表

同索隱曰志屬潁川而地理志無之然金日磾封秬侯秬屬濟陰安上之封必與日磾附近山陽濟陰又地界

連接瓠河又東逕黎縣故城南王莽改曰黎治矣孟康

曰今黎陽也薛瓚言按黎陽在魏郡非此黎陽也一清按師

古註引瓚曰黎陽在魏郡非黎縣也道元蓋抄變其詞世謂黎侯城昔黎侯陽寓

于衛全氏曰據善長說詩所謂胡為乎泥中毛云泥中

邑名疑此城也土地汙下城居小阜魏濮陽郡治也瓠

河又東逕秬縣故城南地理志曰濟陰之屬縣也褚先

生曰漢武帝封金日磾為侯國王莽之萬歲矣世猶謂

之為萬歲亭也瓠河又東逕鄆城南春秋左傳成公十

六年公自沙隨還待于鄆京相璠曰公羊作運字今東

郡廩丘縣東八十里有故運城即此城也

又北過東郡范縣東北為濟渠與將渠合

瓠河自運城東北逕范縣與濟濮枝渠合故渠上承濟

瀆於乘氏縣北逕范縣左納瓠瀆故經有濟渠之稱又

北與將渠受河於范縣西北東南逕秦亭南杜預釋地

曰東平范縣西北有秦亭也又東南逕范縣故城南王

莽更名建睦也漢興平中靳允為范令曹太祖東征陶謙於徐州張邈迎呂布郡縣響應程昱說允曰君必固范我守東阿田單之功可立即斯邑也將渠又東會濟渠自下通謂之將渠北逕范城東俗又謂之趙溝非也又東北過東阿縣東

瓠河故瀆又東北左合將渠故瀆上承將渠于范縣東北逕范縣北又東北逕東阿城南而東入瓠河故瀆又北逕東阿縣故城東春秋經書冬及齊侯盟于柯左傳曰冬盟于柯始及齊平杜預曰東阿即柯邑也按國語曹沫挾匕首劫齊桓公返遂邑于此矣全氏曰事見公羊非國語

又東北過臨邑縣西又東北過茌平縣東為鄧里渠

自宣防已下將渠已上無復有水將渠下水首受河自北為鄧里渠

又東北過祝阿縣為濟渠

河水自四瀆口出會濟水二瀆合而東注于祝阿也

又東北至梁鄒縣西分為二

脈水尋梁鄒濟無二流蓋經之誤

其東北者為濟河其東者為時水又東北至濟西濟河東北入于海時水東至臨淄縣西屈南過太山華縣東又南至費縣東入于沂

時卽彤水也音而

一清按二字注中注

春秋襄公三年齊晉盟于

彤者也京相璠曰今臨淄唯有澶水西北入沛卽地理

志之如水矣彤如聲相似然則澶水卽彤水也蓋以澶

與時合得通稱矣時水自西安城西南分爲二水枝津

別出西流德會水注之水出昌國縣黃山西北流逕昌

國縣故城南昔樂毅攻齊有功燕昭王以是縣封之爲

昌國君德會水又西北五里泉水注之水出縣南黃阜

北流逕城西北入德會又西北世謂之滄浪溝又北流

注時水地理志曰德會水出昌國西北至西安入如是

也時水又西逕東高宛城中而西注也俗人過令側城

南注又屈逕其城南南史記漢文帝十五年分齊爲膠西

王國都高宛徐廣音義曰樂安有高宛城故俗謂之東

高宛也

一清按道元此注是據史記漢興以來諸侯年表而文帝紀及漢志皆云十六年又史記世家

膠西王卬齊悼惠王子以昌平侯文帝十六年爲膠西

王十一年與吳楚反漢擊破殺卬地入于漢爲膠西郡

又五宗世家膠西王端用皇世子爲膠西王立四十七

年卒國除爲郡而地理志云宣帝本始元年更爲高密

國首高密縣豈膠西國廢復置高密國而改治者與巨

洋水注又云高密郡治桑犢亭世謂之故郡城地志桑

犢北海之屬縣也後漢郡縣皆廢故續志無之

水注之源導延鄉城東北平地出泉西北逕延鄉城北

地理志曰千乘有延鄉縣世人謂故城爲從城延從字

相似讀隨字改所未詳也西北流世謂之蓋野溝又西

北流逕高宛縣北注時水時水又西逕西高宛縣故城南漢高帝六年封丙倩為侯國王莽之常鄉也其水側其源上出盤陽北至高宛下有死時中無水杜預亦云時水於樂安枝流旱則竭涸為春秋之乾時也左傳莊公九年齊魯戰地魯師敗處也時水西北至梁鄒城入于沛全氏曰時水二支一至梁鄒入濟者其流甚短一東行至鉅定入馬車瀆者其流甚長別見淄水注此道元所以補經也非沛入時蓋時來注沛若沛分東流明不得以時為名尋時沛更無別流南延華費之所斯為繆矣汶水出太山萊蕪縣原山西南過羸縣南

萊蕪縣在齊城西南原山又在縣西南六十許里地理

志汶水與淄水俱出原山西南入沛故不得過其縣南

也一清按經自謂汶水過羸縣南耳不云過萊蕪縣南也酈之詮詰始自相伐 從征記曰汶

水出縣西南流又言自入萊蕪谷夾路連山百數里水

陸多行石澗中出藥草饒松柏林藿綿濛崖壁相望或

傾岑阻徑或迴巖絕谷清風鳴條山壑俱響凌高降深

兼惴慄之懼危蹊絕徑過懸度之艱未出谷十餘里有

別谷在孤山谷有清泉泉上數丈有石穴二口容人行

入穴丈餘高九尺許廣四五丈言是昔人居山之處薪

爨烟墨猶存谷中林木緻密行人尠有能至矣又有少

許山田引灌之踪尙存出谷有平邱面山傍水土人悉以種麥云此邱不宜殖稷黍而宜麥齊人相承以殖之意謂麥邱所栖愚公谷也何其深沉幽翳可以託業怡生如此也余時逕此爲之踟躕爲之屢眷矣余按麥邱愚公在齊不在魯川谷猶傳其名蓋誌者之謬耳汶水又西南逕羸縣故城南春秋左傳桓公三年公會齊侯于羸成婚于齊也

又東南過奉高縣北

奉高縣漢武帝元封元年立以奉太山之祀太山郡治也縣北有吳季札子墓在汶水南曲中季札之聘上國

也喪子於羸博之間卽此處也從征記曰羸縣西六十里有季札兒冢冢圓其高可隱也前有石銘一所漢末奉高令所立無所述敘標誌而已自昔恒蠲民戶灑掃之今不能然碑石糜碎靡有遺矣唯故趺存焉

屈從縣西南流

汶出牟縣故城西南阜下俗謂之胡盧堆淮南子曰汶

出弗其高誘曰山名也或斯阜也

一清按高誘曰弗其山名在朱虛縣東此

青州之東汶其水東北流入濰見下二

十六卷道元以牟縣胡盧堆當之誤矣牟縣故城在東

北古牟國也春秋時牟人朝魯故應劭曰魯附庸也俗

謂是水爲牟汶也又西南逕奉高縣故城西西南流注

于汶汶水又南右合北汶水水出分水谿源與中川分水東南流逕太山東合天門下谿水水出太山天門下谷東流古者帝王升封咸憇此水水上往往有石竅存焉蓋古設舍所跨處也馬第伯書云光武封太山第伯從登山去平地二十里南向極望無不覩其爲高也如視浮雲其峻也石壁窅窅仰視巖石松樹鬱鬱蒼蒼如在雲中俯視谿谷碌碌不可丈尺直上七十里天門仰視天門如從穴中視天矣應劭漢官儀云太山東南山頂名曰日觀者雞一鳴時見日始欲出長三丈許故以名焉其水自谿而東濬波注壑東南流逕龜陰之田龜

山在博縣北一十五里昔夫子傷政道之陵遲故望山而懷操故琴操有龜山操焉山北卽龜陰之田也春秋定公十年齊人來歸龜陰之田是也又合環水水出太

山南谿南流歷中階兩廟閒從征記曰太山有下中上三廟牆闕嚴整廟中柏樹夾兩階大二十餘圍蓋漢武所植也赤眉嘗斫一樹見血而止今斧創猶存門閣三重樓榭四所三層壇一所高丈餘廣八尺樹前有大井極香冷異于凡水不知何代所掘不常浚渫而水旱不減廟中有漢時故樂器及神車木偶皆靡密巧麗又有

石勒建武十三年一清按建武是石虎年號注誤證永貴侯張余上金

馬一匹高二尺餘形制甚精中廟去下廟五里屋宇又崇麗于下廟廟東西夾澗上廟在山頂卽封禪處也其

水又屈而東流入于汶水

一清按四字羨文

又東南流逕南

清

按南字羨文或漢字之誤蓋周明堂與漢明堂爲二矣

明堂下漢武帝元封元年

封太山降坐明堂於山之東北陞武帝以古處嶮狹而

不顯也欲治明堂于奉高傍而未曉其制濟南人公玉

帶上黃帝時明堂圖圖中有一殿四面無壁以茅蓋之

通水園宮垣爲複道上有樓從西南入名曰崑崙天子

從之入以拜祀上帝焉于是上令奉高作明堂于汶上

如帶圖也古引水爲辟雍處基瀆存焉世謂此水爲石

汶山海經曰環水出太山東流注于江

一清按郭璞曰江一作海此江

字固誤海字亦非當作汶

卽此水也環水又左入于汶水汶水又西

南流逕徂徠山西山多松柏詩所謂徂徠之松也廣雅

曰道梓松也抱朴子稱玉策記曰千歲之松中有物或

如青牛或如青犬或如人皆壽萬歲又稱天陵有偃蓋

之松也所謂樓松也魯連子曰松樅高千仞而無枝非

憂正室之無柱也爾雅曰松葉柏身曰樅鄒山記曰徂

徠山在梁甫奉高博三縣界猶有美松亦曰九徠之山

也赤眉渠帥樊崇所堡也故崇自號九徠三老矣山東

有巢父廟山高十里山下有陂水方百許步三道流注

一水東北沿溪而下屈逕縣南西北流入于汶一水北流歷澗西流入于汶一水南流逕陽關亭南春秋襄公十七年逆臧紇自陽關者也又西流入于汶水也

過博縣西北

汶水南逕博縣故城東春秋哀公十一年會吳伐博者

也一清按左氏傳云為郊戰故公會吳子伐齊五月取博杜預曰博齊邑注所引未備灌嬰破田

橫於城下屈從其城南西流不在西北也汶水又西南

逕龍鄉故城南春秋成公二年齊侯圍龍龍囚頃公嬖

人盧蒲就魁殺而膊諸城上齊侯親鼓取龍者也漢高

帝八年封謁者陳署為侯國汶水又西南逕亭亭山東

黃帝所禪也山有神廟水上有石門舊分水水下漑處也

汶水又西南逕陽關故城西本鉅平縣之陽關亭矣春

秋襄公十七年逆臧紇自陽關者矣一清按十五字已見上此複出陽

虎據之以叛伐之虎焚萊門而奔齊者也汶水又南左

會淄水水出太山梁父縣東南流逕菟裘城北全氏曰此

又一淄水杜預所云入汶水者也鄭樵誤以為萊蕪之淄王士禎不知而妄非之春秋隱公十

一年營之公謂羽父曰吾將歸老焉故郡國志曰梁父

有菟裘聚淄水又逕梁父縣故城南縣北有梁父山開

山圖曰太山在左亢父在右亢父知生梁甫主死王者

封太山禪梁甫故縣取名焉淄水又西南逕柴縣故城

北地理志曰太山之屬縣也世謂之柴汶矣淄水又逕

郈縣北漢高帝六年封董濼為侯國一清按史表作成侯索隱曰屬涿郡

地理志涿郡成縣侯國春秋齊師圍郈郈人伐齊飲馬于斯水也

昔孔子行於郈之野遇榮啟期于是衣鹿裘被髮琴歌

三樂之懽夫子善其能寬矣淄水又西逕陽關城南西

流注于汶水汶水又南逕鉅平縣故城東而西南流城

東有魯道詩所謂魯道有蕩齊子由歸者也今汶上夾

水有文姜臺汶水又西南流詩云汶水滔滔矣淮南子

曰貉渡汶則死天地之性倚伏難尋固不可以情理窮

也全氏曰按王伯厚云列子釋文史記汶與岷同謂汶江也今江邊人云狐不渡江然則非東州之汶汶

水又西南逕魯國汶陽縣北王莽之汶亭也縣北有曲

水亭春秋桓公十二年經書公會杞侯莒子盟于曲池

左傳云平杞莒也故杜預曰魯國汶陽縣北有曲水亭

漢章帝元和二年東巡太山立行宮于汶陽執金吾耿

恭屯城門於汶上基塹存焉世謂之闕陵城也汶水又

西逕汶陽縣故城北西注禹貢雖指元和志乾封縣界五汶源別而流同五汶者曰

北汶嬴汶柴汶牟汶其一則經流也按酈注無嬴汶嬴

汶在今萊蕪縣南三十里源出宮山之陰流合牟汶宮

山者新甫之別名也山在新泰縣西北泮水源自泰山

分水嶺即北汶州志謂之塹汶在今泰安州南五汶之

外有小汶在州東南七十里源出宮山流逕徂徠山南

又西入汶水所謂大汶口也嬴汶合牟汶故酈注不言

山沔水所出東北入濰說文水出靈門山世謂之沔汶
 在今莒州界與萊蕪無涉志妄言耳東汶出朱虛縣小
 泰山北流至淳于縣入濰在今臨朐安邱縣界淮南子
 曰汶出弗其流入濟高誘曰弗其山名在朱虛縣東是
 即入濰之東汶言入濟者淮南之誤也一清按五汶之
 名始于郭緣生述征記曰泰山郡水皆名曰汶汶凡有
 五北汶嬴汶柴汶沔汶皆源別而流同沔汶遠在瑯琊
 闕入泰山郡域近志因之而誤東樵正之是矣乃欲以
 小汶易嬴汶則非考泰安圖志嬴汶與牟汶合自萊蕪
 縣東北流逕縣西南至泰安縣東北之故縣鎮與出仙
 臺嶺水會名曰大汶亦曰塹汶東樵以北汶為塹汶亦
 非又西南流與石汶合石汶者環水也又西南流與北
 汶合北汶者泮水也濟水篇注云半水出分水谿者是
 也四汶共流而西南小汶水會之小汶出新泰縣東北
 龍堂山西流百二十里入泰安縣東南境至縣西南逕
 徂徠山南故柴城北而合于大汶尋其川脈即古柴汶
 之道柴汶本出梁父縣東西流逕菟裘城又西流逕梁
 父縣故城又西流逕柴縣故城又西流逕郟縣北又西
 流逕陽關城南而西合于汶水今梁父縣東之上源已
 絕而下流僅至古柴城即入于大汶不能至陽關城陽

關城更在古柴城之西然小汶之行甚遠其吐納眾水
 亦甚夥倘古有是水道元無容不詳記之此必溝通之
 以合于柴汶其後水流既盛而柴汶遂為所奪大汶小
 汶之名皆起于後世彼以合嬴牟北石四汶故名之曰
 大此則專合柴汶故名曰小是五汶者又并而為二以
 出于大汶口西歷塌城壩又西北歷戴村壩入于大清
 河即古濟水之故道也蓋嬴牟二汶由東達西橫水也
 北石二汶自南注北直水也柴汶出東北以注西南亦
 橫水也五汶之名不當去嬴以郭記李志皆先記之矣
 道元不別出嬴汶者以嬴為汶水發源經流也郭記書
 中屢引之而此獨不從其說未知何故豈亦以其誤
 數語汶為不足據耶予有五汶考五篇辭多不載

又西南過蛇邱縣南

汶水又西泲水出焉又西逕蛇邱縣南縣治鑄鄉故城

春秋左傳宣叔娶于鑄是也杜預曰濟北蛇邱縣所治鑄鄉城者也

又西南過岡縣北

地理志岡故闡也王莽更之曰柔也一清按地理志本作剛縣故新莽以

柔易稱應劭曰春秋經書齊人取謹及闡是也杜預春秋

釋地曰闡在剛縣北岡城東有一小亭今岡縣治俗人

又謂之闡亭京相璠曰岡縣西四十里有闡亭未知孰

是汶水又西蛇水注之水出縣東北泰山西南流逕汶

陽之田齊所侵也自汶之北平暢極目僖公以賜季友

蛇水又西南逕鑄城西左傳所謂蛇淵圍也故京相璠

曰今濟北有蛇邱城城下有水魯圍也俗謂之濁須水

非矣蛇水又西南逕夏暉城南經書公會齊侯于下謹

是也今俗謂之夏暉城蓋春秋左傳桓公三年公子翬

如齊齊侯送姜氏于下謹非禮也是也世有夏暉之名

矣蛇水又西南入汶汶水又西溝水注之水出東北馬

山西南流逕棘亭南春秋成公三年經書秋叔孫僑如

帥師圍棘左傳曰取汶陽之田棘不服圍之南去汶水

八十里又西南逕遂城東地理志曰蛇邱遂鄉故遂國

也春秋莊公十三年齊滅遂而戍之者也京相璠曰遂

在蛇邱東北十里杜預亦以為然然縣東北無城以擬

之今城在蛇邱西北蓋杜預傳疑之非也又西逕下謹

城西而入汶水汶水又西逕春亭北考古無春名唯平

陸縣有崇陽亭然是亭東去岡城四十里推璠所注則符並所未詳也

一清按推璠所注謂京相璠春秋土地名也是注既不引其書何為濫及乎

又西南過東平章縣南

地理志曰東平國故梁也景帝中六年別為濟東國武帝元鼎元年為大河郡宣帝甘露二年為東平國王莽之有鹽也章縣按世本任姓之國也春秋齊人降章者也故城在無鹽東北五十里汶水又西南有泌水注之水出肥成縣東北白原西南流逕肥成縣故城南樂正子春謂其弟子日子適齊過肥肥有君子焉左逕句窳亭北章帝元和二年鳳凰集肥城句窳亭復其租而巡

泰山即是亭也泌水又西南逕富城縣故城西王莽之成富也其水又西南流注于汶汶水又西南逕桃鄉縣故城西王莽之鄆亭也世以此為鄆城非蓋因亡新之故目耳

又西南過無鹽縣南又西南過壽張縣北又西南至安民亭入于濟

汶水自桃鄉四分當其派別之處謂之四汶口其左二水雙流西南至無鹽縣之郈鄉城南魯叔孫昭伯之故

邑也禍及鬪雞矣

全氏曰郈昭伯以鬪雞啟禍昭伯春亡後郈始歸叔孫昭子善長誤矣

秋左傳定公十二年叔孫氏墮郈今其城無南面汶水

又西南逕東平陸縣故城北應劭曰古厥國也今有厥亭汶水又西逕危山南世謂之龍山也漢書五行志曰

哀帝時無鹽危山土自起覆草如馳道狀又瓠山石轉

立晉灼曰漢注作報山

全氏曰八字注中注一清按漢志北海郡瓠縣師古曰瓠即報

字而宣元六王傳瓠山晉灼曰漢注作報山師古曰報

山古作瓠字為其形似瓠耳又通而為狐地理志河東

狐譟之狐史漢表俱作瓠徐廣山脇石一枚轉側起立

日音胡索隱曰即狐字可證也

高九尺六寸傍行一丈廣四尺東平王雲及后謁曰漢

世石立宣帝起之表也自之石所祭治石象報山立石

束倍草并祠之建平三年息夫躬告之王自殺后謁棄

市國除何氏曰事在宣元六王傳汶水又西合為一水

西南入茂都澱澱陂水之異名也澱水西南出謂之巨

野溝又西南逕致密城南郡國志曰須昌縣有致密城

古中都也即夫子所宰之邑矣制養生送死之節長幼

男女之禮路不拾遺器不彫偽矣巨野溝又西南入桓

公河北水西出澱謂之巨良水西南逕致密城北西南

流注洪瀆次一汶西逕郈亭北又西至壽張故城東逕

為澤渚初平三年曹公擊黃巾於壽張東鮑信戰死於

此其右一汶西流逕無鹽縣之故城南舊宿國也齊宣

后之故邑所謂無鹽醜女也漢武帝元朔四年封城陽

亭汶水又西逕郈鄉城南地理志所謂無鹽有郈鄉者也汶水西南流逕壽張縣故城北春秋之良縣也縣有壽聚漢曰壽良應劭曰世祖叔父名良故光武改曰壽張也建武十五年世祖封樊宏爲侯國汶水又西南長直溝水注之水出須昌城東北穀陽山南逕須昌城東又南漆溝水注焉水出無鹽城東北五里阜山下西逕無鹽縣故城北水側有東平憲王蒼冢碑闕存焉元和二年章帝幸東平祀以太牢親拜祠坐賜御劔于陵前其水又西流注長直溝溝水奇分爲二一水西逕須昌城南入泲一水南流注于汶汶水又西流入泲故淮南

子曰汶出弗其西流合泲高誘云弗其山名在朱虛縣東余按誘說是乃東汶非經所謂入泲者也蓋其誤證耳

水經注釋卷二十四終

水經注釋卷二十五

仁和趙一清誠夫錄

泗水

沂水

洙水

泗水出魯卞縣北山

地理志曰出濟陰乘氏縣又云出卞縣北

閻氏若璩潛邱劄記曰泗

水出乘氏此出字乃後人所加班固自註原無出字漢書未可輕也一清按地志卞縣下亦無出字經言

北山皆為非矣山海經曰泗水出魯東北余昔因公事

沿歷徐沈路逕洙泗因令尋其源流水出卞縣故城東

南桃墟西北春秋昭公七年謝息納季孫之言以孟氏

成邑與晉而遷于桃杜預曰魯國卞縣東南有桃墟

清一

按舜後姓姚又賜姓媯此桃墟當因姚墟而訛沔水亦有姚墟媯墟之稱也世謂之曰陶墟

舜所陶處也井曰舜井皆為非也墟有漏澤方一十五里淶水微渟三丈如減澤西際阜俗謂之媯亭山蓋有陶墟舜井之言因復有媯亭之名矣阜側有三石穴廣圓三四尺穴有通否水有盈漏漏則數夕之中傾陂竭澤矣左右民居識其將漏預以木為曲洑約障穴口魚鼈暴鱗不可勝載矣自此連岡通阜西北四十許里岡之西際便得泗水之源也博物志曰泗出陪尾蓋斯阜者矣石穴吐水五泉俱導泉穴各徑尺餘水源南側有一廟栝柏成林時人謂之原泉祠非所究也泗水西逕

其縣故城南春秋襄公二十九年季武子取卞曰聞守卞者將叛臣率徒以討之是也南有姑蔑城春秋隱公元年公及邾儀父盟于蔑者也水出二邑之間西逕郟城北春秋文公七年經書公伐邾三月甲戌取須句遂城郟杜預曰魯邑也卞縣南有郟城備邾難也泗水自卞而會于洙水也

西南過魯縣北

泗水又西南流逕魯縣分為二流水側有一城為二水之分會也北為洙瀆春秋莊公九年經書冬浚洙京相璠曰服虔杜預竝言洙水在魯城北浚深之為齊備也

南則泗水夫子教于洙泗之間今于城北二水之中即
 夫子領徒之所也從征記曰洙泗二水交于魯城東北
 十七里闕里背洙面泗南北一百二十步東西六十步
 四門各有石闕北門去洙水百步餘後漢初闕里荆棘
 自闕從講堂至九里鮑永為相因修饗祠以誅魯賊彭
 豐等郭緣生言泗水在城南非也余按國語宣公夏濫

于泗淵里革斷罟棄之韋昭云泗在魯城北一清按日知錄公羊

閔公二年傳桓公使高子將南陽之甲立僖公而城魯或曰自鹿門至于爭門者也或曰自爭門至于吏門者也注鹿門魯南城東門也據左傳臧紇斬鹿門之關出奔邾是也爭門吏門竝闕按說文淨魯城門池也从水爭聲士耕切是爭門即以此水名省文作爭爾後人以淨字省作淨音才性切而梵書用之自南北史以下俱

為才性之淨而魯之爭門不復知之今考道元所記史魯城北為泗水則此地當是引泗以為濠而失記之

記冢墓記王隱地道記咸言葬孔子於魯城北泗水上
 今泗水南有夫子冢春秋孔演圖曰鳥化為書孔子奉

以告天赤爵銜書上化為黃玉刻曰孔提命作應法為
 赤制說題辭曰孔子卒以所受黃玉葬魯城北即子貢

廬墓處也譙周云孔子死後魯人就冢次而居者百有
 餘家命曰孔里孔藜曰夫子墓塋方一里在魯城北六

里泗水上諸孔氏封五十餘所人名昭穆不可復識有
 銘碑三所獸碣具存皇覽曰弟子各以四方奇木來植

故多諸異樹不生棘木刺草今則無復遺條矣泗水自

城北南逕魯城西南合沂水沂水出魯城東南尼邱山西北山卽顏母所祈而生孔子也山東一十里有顏母廟山南數里孔子父葬處禮所謂防墓崩者也平地發泉流逕魯縣故城南水北東門外卽爰居所止處也國語曰海鳥曰爰居止於魯城東門之外三日臧文仲祭之展禽譏焉故莊子曰海鳥止郊魯侯觴之奏以廣樂具以太牢三日而死此養非所養矣門郭之外亦戎夷死處呂氏春秋曰昔戎夷違齊如魯天大寒而後門與弟子宿於郭門外寒愈甚謂弟子曰子與我衣我活我與子衣子活我國士也爲天下惜子不肖人不足愛弟

子曰不肖人惡能與國士并衣哉戎夷歎曰不濟夫解衣與弟子半夜而死沂水北對稷門昔圉人犖有力能投蓋于此門服虔曰能投千鈞之重過門之上也杜預謂走接屋之桷反覆門上也春秋僖公二十年經書春新作南門左傳曰書不時也杜預曰本名稷門僖公更高大之今猶不與諸門同故名高門也其遺基猶在地八丈餘矣亦曰雩門春秋左傳莊公十年公子偃請擊宋師竊從雩門蒙臯比而出者也門南隔水有雩壇壇高三丈曾點所欲風舞處也高門一里餘道西有道兒君碑是魯相陳君立昔曾參居此臯不入境縣卽曲阜

之地少昊之虛有大庭氏之庫春秋豎牛之所攻也故
劉公幹魯都賦曰戢武器於有炎之庫放戎馬於巨野
之垆周武王封姬旦於曲阜曰魯秦始皇二十三年以
爲薛郡漢高后元年爲魯國全氏曰按是文引漢志然實班氏之誤高后以城陽
爲魯國不以薛郡阜上有季氏宅宅有武子臺今雖崩
夷猶高數丈臺西百步有大井廣三丈深十餘丈以石
壘之石似磬制春秋定公十二年公山不狃帥費人攻
魯公入季氏之宮登武子之臺也臺之西北二里有周
公臺高五丈周五十步臺南四里許則孔廟卽夫子之
故宅也宅大一頃所居之堂後世以爲廟漢高祖十三

年過魯以太牢祀孔子自秦燒詩書經典淪缺漢武帝
時魯共王壞孔子舊宅得尙書春秋論語孝經時人已
不復知有古文謂之科斗書漢世秘之希有見者于時
聞堂上有金石絲竹之音乃不壞矣廟屋三間夫子在
西面東向顏母在中間南面夫人隔東一間東向夫子
牀前有石硯一枚作甚朴云平生時物也魯人藏孔子
所乘車於廟中是顏路所請者也獻帝時廟遇火燒之
永平中鍾離意爲魯相到官出私錢萬三千文付戶曹
孔訢治夫子車身入廟拭几席劍履男子張伯除堂下
草土中得玉璧七枚伯懷其一以六枚白意意令主簿

安置几前孔子寢堂牀首有懸甕意召孔訢問何等甕也對曰夫子甕也背有丹書人勿敢發也意曰夫子聖人所以遺甕欲以懸示後賢耳發之中得素書文曰後世修吾書董仲舒護吾車拭吾履發吾笥會稽鍾離意璧有七張伯藏其一意即召問伯果服焉魏黃初二年金石錄跋尾曰魏志文帝以黃初二年正月下詔今以碑考之乃黃初元年詔語亦小異當以碑為正也文

帝令郡國修起孔子舊廟置百戶吏卒一清按原本作百夫吏卒誤也

曹植撰孔羨奉家祀碑作百戶吏卒今是碑載隸釋闕里志作百戶卒史三國志魏紀黃初二年以議郎孔羨為宗聖侯邑百戶奉孔子祀令魯郡修起舊廟置百戶吏卒以守衛之與碑足相證明隸釋闕里志所改則非也而顧炎武金石文字記曰百石卒史者秩百石之卒史也漢書儒林傳郡國置五經百石卒史倪寬傳補廷

尉文學卒史臣瓚曰漢注卒史秩百石是也然其自注又云杜氏通典作百戶吏卒三國志同蓋未能審定爾何焯曰亭林但據桓帝永興元年魯相乙瑛置孔子廟百石卒史不知黃初自置百戶吏卒未可執此例彼也百石卒史掌領禮器選年四十以上經通六藝雜試通利能奉宏先聖之禮為宗所歸者乃是孔氏子孫為之百戶吏卒則廟有夫子像列二弟子執卷立侍穆穆有守衛之人耳

詢仰之容漢魏以來廟列七碑二碑無字枯柏猶茂清

按注云廟列七碑二碑無字則五碑有文字可知矣並見隸釋一孔廟置守廟百石孔龢碑威宗永興元年一魯相韓勅造孔廟禮器碑永壽二年一韓勅修孔廟後碑永壽三年一魯相史晨祠孔廟奏銘靈帝建寧二年一史晨饗孔廟後碑俱云水經有故知即是七碑中之五碑也孔宏復闕里志云語云世遠言湮文獻難徵之謂也曲阜為天下宗國歷代表揚無遺矣累朝典禮疆域規模陵廟增飾猶多湮沒惟水經注存漢魏之迹東遊記詳魯疆之槩斯文不亡闕里之幸也東遊記是元皇慶中紫陽楊奐著

有顏母廟廟像猶嚴有修栝五株孔廟東南五百步有雙石闕卽靈光之南闕北百餘步卽靈光殿基東西二十四丈南北十二丈高丈餘東西廊廡別舍中間方七百餘步闕之東北有浴池方四十許步池中有釣臺方十步臺之基岸悉石也遺基尙整故王延壽賦曰周行數里仰不見日者也是漢景帝程姬子魯共王之所造也殿之東南卽泮宮也在高門直北道西宮中有臺高八十尺臺南水東西一百步南北六十步臺西水南北四百步東西六十步臺池咸結石爲之詩所謂思樂泮水也沂水又西逕圓邱北邱高四丈餘沂水又西流昔

韓雉射龍於斯水之上尸子曰韓雉見申羊於魯有龍飲於沂韓雉曰吾聞之出見虎搏之見龍射之今弗射是不得行吾聞也遂射之沂水又西右注泗水者也

又西過瑕邱縣東屈從縣東南流潯水從東來注之

瑕邱魯邑春秋之負瑕矣哀公七年季康子伐邾囚諸負瑕是也應劭曰瑕邱在縣西南昔衛大夫公叔文子升於瑕邱蘧伯玉從文子曰樂哉斯邱死則我欲葬焉伯玉曰吾子樂之則瑗請前刺其欲害民良田也瑕邱

之名蓋因斯以表稱矣曾子弔諸負夏鄭元皇甫謐竝言衛地魯衛雖殊土則一也

厄林曰縣邑同號地志已多于時魯有瑕邱何知衛

無茲壟周之典制國有分土行李所過聚櫟是防若瑕邱獨為魯田寸壤皆非衛有未聞銜命介使憑覽敵國之墟而終沒大夫卜筮強鄰之陌者也且此處所敘咸在邾魯封域忽入衛事于理殊乖又負夏可為負瑕則虞舜所遷豈亦在是乎一清按衛瑕邱在今開州東南三十里秦置濮陽郡即衛之帝邱成公自楚邱來遷者也公叔之云宜在彼地道元誤

鄒水出東海合鄉縣漢以魯瑕邱當之誠如方叔所譏

和帝永寧九年封馬光子復為侯國

一清按此注皆誤據范史云永初七年

年復紹封光子朗為合鄉侯則復非其名且事在安帝永初七年非和帝永寧九年永寧亦安帝紀年次年之七月即改

其水西南流入邾春秋哀公二年季孫斯伐邾取鄒東田及沂西田是也

鄒水又逕魯國鄒山東南而西南流春秋左傳所謂嶧山也邾文公之所遷今城在鄒山之陽依巖咀以墉固故邾婁之國曹姓也叔梁

紇之邑也孔子生於此後乃縣之因鄒山之名以氏縣

也全氏曰以鄒為鄒則孔子乃邾婁國人耶善長可謂大繆矣王莽之鄒亭矣京相

璠曰地理志嶧山在鄒縣北一清按漢志作騶縣繹邑之所依以

為名也山東西二十里高秀獨出積石相臨殆無土壤石間多孔穴洞達相通往往有如數間屋處其俗謂之嶧孔遭亂輒將處人入嶧外寇雖眾無所施害晉永嘉

中大尉郗鑒將鄉曲保此山胡賊攻守不能得今山南有大嶧名曰郗公嶧山北有絕巖秦始皇觀禮於魯登於嶧山之上命丞相李斯以大篆勒銘山頂名曰書門

詩所謂保有鳧嶧者也鄒水又西南逕蕃縣故城南又

西逕薛縣故城北地理志曰夏車正奚仲之國也竹書紀年梁惠成王三十一年邳遷于薛改名徐州城南山上
有奚仲冢晉太康地記奚仲冢在城南二十五里山上
百姓謂之神靈也齊封田文於此號孟嘗君有惠譽
今郭側猶有文冢結石爲郭作制嚴固塋麗可尋行人
往還莫不逕觀以爲異見矣澗水又西逕仲虺城北晉
太康地記曰奚仲遷於邳仲虺居之以爲湯左相其後
當周爵稱侯後見侵削霸者所絀爲伯任姓也應劭曰
邳在薛徐廣史記音義曰楚元王子郢客以呂后二年
封上邳侯也有下故此爲上矣晉書地道記曰仲虺城
在薛城西三十里澗水又西至湖陸縣入于泗故京相
璠曰薛縣澗水首受蕃縣西注山陽湖陸是也經言瑕
邱東誤耳

又南過平陽縣西

縣卽山陽郡之南平陽縣也竹書紀年曰梁惠成王二
十九年齊田盼及宋人伐我東鄙圍平陽者也王莽改
之曰龜平矣泗水又南逕故城西世謂之漆鄉應劭十
三州記曰漆鄉邾邑也杜預曰平陽東北有漆鄉郭今
見有故城西南方二里所未詳也

又南過高平縣西洸水從西北來流注之

泗水南逕高平山山東西十里南北五里高四里與衆山相連其山最高頂上方平故謂之高平山縣亦取名焉

泗水又南逕高平縣故城西漢宣帝地節三年封丞相

魏相為侯國

全氏曰姜宸英曰此二句是後人所妄加蓋善長既知高平是王莽所改則魏相所

封非此高平明矣豈尚引之乎何焯曰弱翁所封蓋臨淮之高平地志注曰侯國者也予按漢表高平屬柘柘

是淮陽之屬縣也一清按今江南宿遷縣疑是弱翁封邑高帝八年封將軍陳錯為

橐侯

全氏曰按八年當作七年陳錯漢表作陳錯沈氏曰橐今史漢表皆作橐誤也小司馬曰屬山陽則

是橐矣臣瓚曰音拓然師古註漢表讀作公老翻是唐人已誤橐為橐矣一清按郡國志亦作橐東平憲王傳

仍是橐字橐之與橐未能一定寧得據志以駁表乎地理志曰縣故山陽之橐也

全氏曰按漢志無是文王莽改曰高平應劭曰章帝改按本志曰

王莽更名章帝因之矣所謂洗水者洙水也蓋洗洙相入互受通稱矣

又南過方與縣東

漢哀帝建平四年縣女子田無嗇生子先未生二月兒

啼腹中及生不舉葬之陌上三日人過聞啼聲母掘養之

菏水從西來注之

菏水即沛水之所苞注以成湖澤也而東與泗水合於

湖陵縣西六十里穀庭城下俗謂之黃水口黃水西北

通巨野澤蓋以黃水沿注于菏故因以名焉

禹貢錐指曰地記之

言水也凡二水大小相敵既合流自下皆得通稱多至五六水亦然漢志魯國汴縣泗水至方與入沛說文泗受沛水東入淮其所謂沛即沛水也又漢志蕃縣南梁水西至湖陵入沛渠酈善長云沛在湖陸西而左注泗泗沛合流地記或言沛入泗泗亦言入沛故有入沛之文按觀魚臺下臨沛水而公羊傳以棠為濟上邑則以沛為濟漢初已然故班固謂泗入濟許慎謂泗受濟而不言沛以沛即濟也水經濟水篇所敘自乘氏以至湖陸即分濟之沛自沛縣以至睢陵即入淮之泗而皆以爲濟水蓋本漢志以立文也然又云濟水東至乘氏縣西分爲二南爲沛水北爲濟瀆而泗水篇則自方與受沛以至睢陵入淮皆以爲泗水是又與禹貢合水經非一時一手作觀于此而益驗竊謂濟雖小水而能專達于海故得與四瀆之列使合泗入淮者亦濟則是因淮以達海矣安得謂之瀆禹主名山川不相假借而後世地記以沛泗爲濟本支不分大戾經旨不詳辨之何以使禹貢之書著明如日月哉

又屈東南過湖陸縣南涓涓水從東北來流注之

地理志曰故湖陵縣也沛水在南王莽更曰湖陸應劭

曰尚書一名湖陵章帝封東平王蒼子爲湖陵侯更名

湖陵也一清按此注全是襲用漢志而又誤者漢志山陽郡湖陵縣下云禹貢浮于淮泗通于河水在

南莽曰湖陸應劭曰尚書一名湖章帝封東平王蒼子

爲湖陵侯更名湖陵通于河據說文是達于河一名湖

之湖亦當是沛字蓋仲瑗引尚書之沛以證世本漢書

通于河之誤傳寫者更訛而爲湖道元不察又加陵字

遂有尚書一名湖陵之繆詞此酈氏之疎非應氏之過

又按後漢書光武帝紀建武五年幸沛進幸湖陵則復

號不始于章帝抑或史家追書之詞耶更考郡國志山

陽郡湖陸故湖陵章帝更名劉昭補註云前漢志王莽

改曰湖陸章帝復其號晉以後總泗水又東逕郟鑿所

築城北又東逕湖陵城東南昔桓溫之北入也范曄擒

慕容忠於此城東有度尚碑一清按隸釋有漢荊州刺

湖陸人威宗永康元年立洪适曰此碑在湖陸荒野政和壬辰巡檢王當世見之始遷于官廨其後邑令滕君欲徙碑於沛舟三載而三覆繼因大水漲泗水又左會沒不出劉宗儀攝事乃能立之使星亭云

南梁水地理志曰水出蕃縣今縣之東北平澤出泉若輪焉發源成川西南流分爲二水北水枝出西逕蕃縣北又西逕滕城北春秋左傳隱公十一年滕侯薛侯來朝爭長薛侯曰我先封滕侯曰我周之卜正也薛庶姓也我不可以後之公使羽父請薛侯曰君辱在寡人周諺有之曰山有木工則度之賓有禮主則擇之周之宗盟異姓爲後寡人若朝于薛不敢與諸任齒君若辱貺寡人則願以滕君爲請薛侯許之乃長滕侯者也漢高

祖封夏侯嬰爲侯國號曰滕公全氏曰夏侯嬰嘗爲滕也嬰封汝陰善長誤矣鄧晨曰今沛郡公邱也其水又漑於邱焉

縣故城在滕西北城周二十里內有子城按地理志卽

滕也周懿王子錯叔繡文公所封也朱氏謀璋箋曰漢志沛郡公邱縣注謂滕是周懿王子錯叔繡所封故注仍其說一清按顏師古亦云未詳其義蓋古傳記有之第文公字又未知所出齊滅之秦以爲縣漢武帝元朔三年封魯共王子

劉順爲侯國世以此水漑我良田遂及百秭故有兩溝

之名焉南梁水自枝渠西南逕魯國蕃縣故城東俗以

南鄰於澗亦謂之西澗水南梁水又屈逕城南應劭曰

縣古小邾邑也地理志曰其水西流注于沛一清按漢志魯國蕃

縣南梁水西至湖陵入沛渠沛當作沛

沛在湖陸西而左注泗泗沛合流

故地記或言沛入泗泗亦言入沛互受通稱故有入沛之文闕駟十三州志曰西至湖陸入泗是也經無南梁之名而有涓涓之稱疑卽是水也戴延之西征記亦言湖陸縣之東南有涓涓水亦無記於南梁謂是吳王所導之瀆也余按湖陸西南止有是水延之蓋以國語云吳王夫差起師將北會黃池掘溝於商魯之間北屬之沂西屬于沛以是言之故謂是水爲吳王所掘非也余以水路求之止是泗川耳蓋北達沂西北逕於商魯而接於沛吳所浚廣耳非謂起自東北受沂西南注沛也

假之有通非吳所趣年載誠眇人情厠近以今忖古益知延之之不通情理矣泗水又南瀆水注之又逕薛之上邳城西而南注者也

全氏曰前已言瀆水自湖陸入泗矣此又忽出瀆水逕上邳南

注泗之文不幾複與倘所謂西瀆水近是

又南過沛縣東

昔許由隱於沛澤卽是縣也縣蓋取澤爲名宋滅屬楚在泗水之濱於秦爲泗水郡治黃水注之黃水出小黃縣黃鄉黃溝國語曰吳子會諸侯于黃池者也黃水東流逕外黃縣故城南張晏曰魏郡有內黃縣故加外也薛瓚曰縣有黃溝故縣氏焉圈稱陳畱風俗傳曰縣南

有渠水於春秋為宋之曲棘里故宋之別都矣春秋昭

公二十五年宋元公卒於曲棘是也宋華元居於稷里

宣公十五年楚鄭圍宋晉解揚一清按下有脫字楚圍致命于

此宋人懼使華元乘闖夜入楚師登子反之牀全氏曰乘闖是

穀梁傳文登牀是左氏傳文善長合而成書曰寡君使元以病告敝邑易子

而食析骸以爨城下之盟所不能也子反退一舍宋楚

乃平今城東闔上猶有華元祠祠之不輟城北有華元

冢黃溝自城南東逕葵邱下春秋僖公九年齊桓公會

諸侯于葵邱宰孔曰齊侯不務德而勤遠略北伐山戎

南伐楚西為此會東略之不知西則否矣其在亂乎君

務靖亂無勤於行晉侯乃還即此地也黃溝又東注大

澤蒹葭莞葦生焉即世所謂大薺陂也陂水東北流逕

定陶縣南又東逕山陽郡成武縣之楚邱亭北一清按此即班

固誤以為衛文公所遷之楚邱而道元因之然分註云有楚邱亭則以城武本有此名耳乃春秋戎伐凡伯之地詳見

濟水注黃溝又東逕郟城北成武縣故城南王莽更之

曰成安也黃溝又東北逕郟城北春秋桓公二年經書

取郟大鼎于宋戊申納于太廟左傳曰宋督攻孔父而

取其妻殺殤公而立公子馮以郟大鼎賂公臧僖伯一清

按傳是哀伯諫為非禮十三州志曰今成武縣東南有此郟氏誤記

郟城俗謂之北郟者也黃溝又東逕平樂縣故城南又

東右合泡水即豐水之上源也水上承大薺陂東逕貫城北又東逕已氏縣故城北王莽之已善也縣有伊尹冢崔駰曰殷帝沃丁之時伊尹卒葬于薄皇覽曰伊尹冢在濟陰已氏平利鄉皇甫謐曰伊尹年百餘歲而卒大霧三日沃丁葬以天子之禮親自臨喪以報大德焉又東逕孟諸澤杜預曰澤在梁國睢陽縣東北又東逕郟城縣故城南地理志曰山陽縣也王莽更名之曰告成矣故世有南郟北郟之論也又東逕單父縣故城南昔宓子賤之治也孔子使巫馬期觀政入其境見夜漁者問曰子得魚輒放何也曰小者吾大夫欲長育之故

也子聞之曰誠彼形此子賤得之善矣惜哉不齊所治者小也王莽更名斯縣為利父矣世祖建武十三年封劉茂為侯國又東逕平樂縣右合泡水水上承淮水於

下邑縣界東北注一水上承淮水於杼秋縣界北流

按兩淮水俱是睢水之誤漢下邑縣在今河南歸德府夏邑縣西南睢水在縣東南漢杼秋縣在江南徐州府豐縣西七十五里睢水在縣南五十里蓋睢河自河南陳留縣東北分河水東南流逕商邱夏邑永城以達于江南之豐縣而下入徐宿二州二泡之水一于下邑分睢者獲水也一于杼秋分睢者穀水也而統謂之睢則以獲水與睢水合流入泗穀水亦入泗與睢水往復逕通互攝兼稱二泡下流乃有豐水之目可知淮字與睢形似致訛世又謂之瓠盧溝水積為渚渚水東北流二渠雙

引左合豐水俗謂之二泡也自下豐泡竝得通稱矣故

地理志曰平樂侯國也泡水所出又逕豐西澤謂之豐水漢書稱高祖送徒麗山徒多亡到豐西澤有大蛇當徑拔劍斬之此卽漢高祖斬蛇處也又東逕大堰水分爲二又東逕豐縣故城南王莽之吾豐也水側城東北流右合枝水上承豐西大堰派流東北逕豐城北東注豐水豐水又東合黃水時人謂之狂水蓋狂黃聲相近俗傳失實也自下黃水又兼通稱矣水上舊有梁謂之泡橋王智深宋史云宋太尉劉義恭於彭城遣軍主嵇元敬北至城覘候魏軍魏軍於清西望見元敬士衆魏南康侯杜道儁引趣泡橋沛縣民逆燒泡橋又於林中

打鼓儁謂宋軍大至爭渡泡水水深酷寒凍溺死者殆半清水卽泡水之別名也全氏曰濟水入汶謂之清水所爭皆泗上之清水而非濟水也其地有曰清西則元

嘉二十七年魏將拓跋建自清西屯蕭城曰清東則魏將步尼公自清東屯畱城曰清南則天監五年梁將藍懷恭築城清南曰清中則永明三年齊角城戍主張蒲入清中是也宋沈攸之魏尉元齊周山圖所爭皆在其地以其爲泗水合睢水入淮之地故亦謂之睢清口泰始三年宋將陳顯達引兵入睢清口是也建元三年齊角城將李安民敗魏師于孫谿渚胡三省曰渚在清水之濱一清按泡水泡橋通

鑑俱作苞字蓋文異耳沈約宋書稱魏軍欲渡清西非也一清按宋史索虜傳楚王樹洛真南康侯杜道儁進軍清西至蕭城步尼公進軍清東至畱城乃清東之軍既遇嵇元敬還趨泡橋則自東而西今云魏軍欲渡清西似失當時形勢矣泡水又東逕

沛縣故城南秦末兵起蕭何曹參迎漢祖於此城高帝

十一年封合陽侯劉仲子為侯國一清按史漢表傳沛侯濞即高祖兄劉仲

之子後封城內有漢高祖廟廟有三碑後漢立廟基以

青石為之階陛尚存劉備之為徐州也治此袁術遣紀

靈攻備備求救呂布布救之屯小沛招靈請備共飲布

謂靈曰元德布弟也布性不熹合鬪但熹解鬪乃植戟

於門布彎弓曰觀布射戟小支中者當各解兵不中可

畱決鬪一發中之遂解此即布射戟支處也述征記曰

城極大四周塹通豐水豐水於城南東注泗即泡水也

地理志曰泡水自平樂縣東北至沛入泗者也一清按漢志山

陽郡平樂縣淮水東北至沛入泗道元兩引班書俱作泡水淮字誤明嘉靖年刊本尚作包字惟去水傍耳猶

可也泗水南逕小沛縣東縣治故城南垞上東岸有泗

水亭漢祖為泗水亭長即此亭也故亭今有高祖廟廟

前有碑延熹十年立廟闕崩禡略無全者水中有故石

梁處遺石尚存高祖之破黥布也過之置酒沛宮酒酣

歌舞慷慨傷懷曰遊子思故鄉也泗水又東南流逕廣

戚縣故城南漢武帝元朔元年封劉澤為侯國全氏曰按善長

引史漢表之例王子侯必稱某王之名則此文當云魯共王子擇擇漢表作將今云澤亦誤也王莽更

之曰力聚也泗水又逕畱縣而南逕垞城東城西南有

崇侯虎廟道淪遺愛不知何因而遠有此圖泗水又南

逕宋大夫桓魋冢西山枕泗水西上盡石鑿而為冢今

人謂之石郭者也郭有二重石作工巧夫子以為不如死之速朽也

又東南過彭城縣東北

泗水西有龍華寺是沙門釋法顯遠出西域浮海東還持龍華圖首創此制法流中夏自法顯始也其所持天竺二石仍在南陸東基堪中其石尚光潔可愛泗水又

南淮水入焉而南逕彭城縣故城東

一清按泗水于下邳淮陰入淮所謂

淮泗之會即角城也彭城之境未為淮水所逕疑是睢水之誤杜元凱所謂睢水首受汴渠東經陳畱梁譙沛彭城入泗者也周顯王四十二年九鼎淪沒泗淵秦始皇時而

鼎見於斯水始皇自以德合三代大熹使數千人沒水

求之不得所謂鼎伏也亦云系而行之未出龍齒齧斷

其系故語曰稱樂大早絕鼎系當是孟浪之傳耳

全氏曰按

周鼎何以過彭城而沒泗水李復疑之舊矣且赧王五十九年而亡次年秦始皇取九鼎見于周本紀上距顯王四十二年乃惠文王之十一年乃武王又六年而崩間以慎觀王六年至赧王之五年乃武王之元年其八年武王薨據甘茂傳武王葬周蓋舉鼎絕臙而死則是時鼎猶未入泗又歷五十年而九鼎始不保以道里計之浮河入渭即至秦土豈由泗乎又況在六十二年之前也其妄明矣史記封禪書又謂宋太邱社亡而鼎沒泗水是周鼎早在宋也夫周鼎何以在宋太邱之社更不可曉矣且使果然則事在顯王三十三年又前乎此亦非四十二年又秦始皇紀是祠泗水以求鼎非鼎見也張守節曰赧王十九年秦昭王取九鼎其一飛入泗水其八入秦是泗水又逕龔勝墓南墓碣尚存又逕亞父

冢東皇覽曰亞父冢在廬江縣郭東居巢亭中有亞父

井吏民親事皆祭亞父於居巢廳上後更造祠于郭東
 至今祠之按漢書項羽傳歷陽人范增未至彭城而發
 疽死不言之居巢今彭城南有項羽涼馬臺臺之西南
 山麓上卽其冢也增不慕范蠡之舉而自絕於斯可謂
 褊矣推考書事墓近於此也

又東南過呂縣南

呂宋邑也春秋襄公元年晉師伐鄭及陳楚子辛救鄭
 侵宋呂留是也縣對泗水漢景帝三年有白頸烏與黑
 烏羣鬪於縣白頸烏不勝墮泗水中死者數千京房易
 傳曰逆親親厥妖白黑烏鬪時有吳楚之反泗水之上

有石梁焉故曰呂梁也昔宋景公以弓工之弓彎弧東
 射矢集彭城之東飲羽於石梁卽斯梁也懸濤崩濟實
 爲泗嶮孔子所謂魚鼈不能游又云懸水三十仞流沫

九十里今則不能也蓋惟嶽之喻未便極天明矣一清按呂

梁洪之險道元時已不能如古矣至明嘉靖二十二年
 管河主事陳洪範惡其石破害運船鑿之使平而禹迹
 蕩然無存矣晉太康地記曰水出磬石書所謂泗濱浮磬者

也泗水又東南流丁溪水注之溪水上承泗水於呂縣
 東南流北帶廣隰山高而注于泗川泗水冬春淺澀常
 排沙通道是以行者多從此溪卽陸機行思賦所云乘
 丁水之捷岸排泗川之積沙者也晉太元九年左將軍

謝元於呂梁遣督護聞人奭用工九萬擁水立七埭以利漕運

又東南過下邳縣西

泗水歷縣逕葛嶧山東

一清按漢志東海郡下邳縣即葛嶧山在西古文以為嶧易

奚仲所遷邳嶧者也泗水又東南逕下邳縣故城西東

南流沂水流注焉故東海屬縣也應劭曰奚仲自薛徙

居之故曰下邳也漢徙齊王韓信為楚王都之後乃縣

焉王莽之閏儉矣東陽郡治文潁曰秦嘉東陽郡人今

下邳是也晉灼曰東陽縣本屬臨淮郡明帝分屬下邳

後分屬廣陵故張晏曰東陽郡今廣陵郡也漢明帝置

下邳郡矣

一清按漢書高帝紀云東陽甯君秦嘉立景駒為楚王註引文潁曰秦嘉東陽郡人為甯

縣君晉灼曰東陽縣也臣瓚曰陳勝傳云凌人秦嘉然則嘉非東陽人嘉初起於邳號大司馬又不為甯縣君

東陽甯君自一人秦嘉又一人史記項籍本紀裴駟集解引陳涉世家云秦嘉廣陵人城有三重

其大城中有大司馬石苞鎮東將軍胡質司徒王渾監

軍石崇四碑南門謂之白門魏武擒陳宮于此處矣

庾林

曰白門所禽者乃奉先非公臺也唐太子賢注范氏書引此注蓋未知善長之誤也中城呂布所

守也小城晉中興北中郎將荀羨郗曇所治也昔太山

吳伯武少孤與弟文章相失二十餘年遇于縣市文章

欲歐伯武心神悲痛因相尋問乃兄弟也縣為沂泗之

會也又有武原水注之水出彭城武原縣西北會注陂

南逕其城西王莽之和樂亭也縣東有徐廟山山因徐

徙卽以名之也山上有石室徐廟也武原水又南合武

水謂之泐水

全氏曰漢志太山郡南武陽縣冠石山治水所出南至下邳入泗應劭曰武水所出

南入泗水經注則以爲泐水而不云出冠石山至沂水篇注云治水出南武陽之冠石山顧不云入泗而云入

沂其舛南逕剛亭城又南至下邳入泗謂之武原水口

錯如此也又有桐水一清按漢志作祠水出西北東海容邱縣東南至下

邳入泗泗水東南逕下相縣故城東王莽之從德也城

之西北有漢太尉陳球墓墓前有三碑是弟子管寧華

歆等所造金石錄目錄百四十九漢太尉陳球碑光和元年百五十漢陳球後碑百五十一漢陳球

碑陰隸釋跋曰水經云下邳陳球墓前有三碑是弟子管寧華歆等造此所見皆故吏故民而無管華姓名豈

與劉寬碑相類其一則弟子所立乎又云陳公兩碑皆

在淮陽莫識爲先後趙氏但有一碑陰而水經謂墓前

有三碑似亦指碑陰爲一碑也一清按洪景伯之言非也

也釋所載二碑皆無管華姓名則弟子所立一碑已

亡故金石錄僅有二碑而乃以碑陰充數何耶初平

四年曹操攻徐州破之拔取慮睢陵夏邱等縣以其父

避難被害於此屠其男女十萬泗水爲之不流自是數

縣人無行跡亦爲暴矣泗水又東南得睢水口泗水又

逕宿預城之西又逕其城南故下邳之宿留縣也王莽

更名之曰康義矣全氏曰水經注引漢志有爲今書所無者或是闕文然亦有絕非闕文而

出于酈氏之妄者西京無下邳郡下邳東海郡之屬縣耳安得下邳郡有宿留縣乎本無此縣又何以云王莽

更名之曰康義乎一清按宿預故城在今邳州宿遷縣東南漢臨淮郡去猶縣之境也東漢省晉義熙中置宿

預縣班志云猶縣下云莽曰秉義康秉字形相似道元引之蓋實宿預之即云猶也而不著云猶之名是其疎畧之過如以為造晉元皇之為安東也督運軍儲而為作無端則太甚矣

邸閣也魏太和中南徐州治後省為戍梁將張惠紹北入水軍所次馮固斯城更增修廓塹其四面引水環之今城在泗水之中也

又東南入于淮

泗水又東逕凌柵南西征記曰舊凌縣之治也泗水又東南逕淮陽城北城臨泗水昔菑邱訢飲馬斬蛟眇目於此處也泗水又東南逕魏陽城北城枕泗川陸機行思賦曰行魏陽之枉渚故無魏陽疑即泗陽縣故城也

王莽之所謂淮平亭矣蓋魏文帝幸廣陵所由或因變之未詳也泗水又東逕角城北而東南流注于淮考諸地說或言泗水于睢陵入淮亦云于下相入淮皆非實錄也

沂水出泰山蓋縣艾山

鄭元云出沂山亦或云臨樂山水有二源南源所導世謂之柞泉北水所發俗謂之魚窮泉俱東南流合成一川右會洛預水水出洛預山東北流注之沂水東南流左合桑預水水北出桑預山東流注于沂沂水又東南螳蜋水入焉水出魯山東南流右注沂沂水又東逕蓋

縣故城南東會連綿之水水發連綿山南流逕蓋城東而南入沂沂水又東逕浮來之山春秋經書公及莒人盟于浮來者也即公來山也在邳鄉西故號曰邳來之間也浮來之水注之其水左控三川右會甘水而注于沂沂水又南逕爆山西山有二峯相去一里雙巒齊秀員峙若一沂水又東南逕東莞縣故城西與小沂水合孟康曰縣故鄆邑今鄆亭是也漢武帝元朔二年封城陽共王子吉為東莞侯魏文帝黃初中立為東莞郡東燕錄謂之團城劉武帝北伐廣固登之以望五龍魏南青州治左氏傳曰莒魯爭鄆為日久矣今城北鄆亭是

也 全氏曰按十三州志曰有東西二鄆魯昭公所居為西鄆在兗州東平郡莒魯所爭為東鄆此邑是也亦即汶陽之田所謂鄆謹龜陰之田者也京相璠曰瑯琊姑幕縣南四十里員亭故魯鄆邑世變其字非也郡國志東莞有鄆亭今

在團城東北四十里猶謂之故東莞城矣小沂水出黃孤山西南流逕其城北西南注于沂沂水又南與閭山水合水出閭山東南流右佩二水總歸于沂沂水南逕東安縣故城東而南合時密水水出時密山春秋時莒地左氏傳莒人歸共仲于魯及密而死是也時密水東

流逕東安城南漢封魯孝王子強為東安侯

一清按漢表疆以宣

帝甘露四年封時密水又東南流入沂沂水又南桑泉水北出

五女山東南流巨圍水注之水出巨圍之山東南注于

桑泉水桑泉水又東南堂阜水入焉其水導源堂阜春

秋莊公九年管仲請囚鮑叔受之及堂阜而稅之杜預

曰東莞蒙陰縣西北有夷吾亭者是也堂阜水又東南

注桑泉水桑泉水又東南逕蒙陰縣故城北王莽之蒙

恩也又東南與叟崗水合水有二源雙會東導一川俗

謂之汶水也一清按此又一汶非入涉及入濰之水于欽以為齊有三汶是已東逕蒙

陰縣注桑泉水又東南盧川水注之全氏曰按漢志太山郡有盧縣即濟

北王國都也城陽國有盧縣即是注所云盧川水者也

盧為周禮職方兗州浸之一班氏遺之師古則曰盧水在濟北盧縣今考太山之盧縣無盧水而城陽乃有之得毋師古偶誤以城陽為濟北耶又瑯邪郡橫縣亦有

盧水入濰然其源流似遜于城陽之盧竊謂師古所指為城陽無疑也今本漢書城陽之盧作慮字慮有慮音

如昌慮取水出鹿嶺山東南流左則二川臻湊右則諸

葛泉源斯奔亂流逕城陽之盧縣故蓋縣之盧上里也

漢武帝元朔二年封城陽共王子劉稀為侯國一清按漢表作

雷侯稀此從史表鄭康成破周禮雷雖為盧維王莽更

雷盧字通用又本表以為東海而注以為城陽

名之曰著善矣又東南注于桑泉水桑泉水又東南右

合蒙陰水水出蒙山之陰東北流昔瑯邪承宮避亂此

山立性好仁不與物競人有認其黍者捨之而去其水

東北流入沂沂水又南逕陽都縣故城東縣故陽國也

齊同盟齊利其地而遷之者也漢高帝六年封將軍丁

復為侯國沂水又南與蒙山水合水出蒙山之陰東流
逕陽都縣南東注沂水沂水又左合溫水水上承溫泉
陂而西南入于沂水者也

南過瑯邪臨沂縣東又南過開陽縣東

沂水南逕中邱城西春秋隱公七年夏城中邱左傳曰
書不時也沂水又南逕臨沂縣故城東郡國志曰瑯邪
有臨沂縣故屬東海郡有治水注之水出太山南武陽
縣之冠石山地理志曰冠石山治水所出應劭地理風

俗記曰武水出焉蓋水異名也東流逕蒙山下有祠

清一

按漢志太山郡有蒙陰縣禹貢之蒙山即在其西南有祠

治水又東南逕顓臾城北

郡國志曰縣有顓臾城季氏將伐之孔子曰昔者先王
以為東蒙主社稷之臣也何以伐為冉有曰今夫顓臾
固而便近于費者也治水又東南流逕費縣故城南地

理志東海之屬縣也為魯季孫之邑子路將墮之公山
弗擾師襲魯弗克後季氏為陽虎所執弗擾以費畔即
是邑也漢高帝六年封陳賀為侯國王莽更名之曰順

從也許慎說文云沂水出東海費縣東西入泗從水斤
聲呂忱字林亦言是矣斯水東南所注者沂水在西不
得言東南趣也皆為繆矣故世俗謂此水為小沂水治
水又東南逕祊城南春秋隱公八年鄭伯請釋泰山之

祀而祀周公使宛歸泰山之祊而易許田杜預釋地曰
祊鄭祀泰山之邑也在瑯邪費縣東南治水又東南流

注于沂

一清按善長既引漢志以為治水為出南武陽之冠石山矣顧不云入泗而云入沂何也泗水

篇有武水云至下邳入泗而其出不云南武陽之冠石山乃云武原水又南合武水謂之沭水已耳此注敘治水于臨沂之下殆因漢志東萊曲成縣出陽邱山之治水云南至沂入海之文而誤也顧宛溪為之說曰沭河有二東沭入沂西沭入泗蓋泗沂交會之處故有此繆今按西沭河出嶧縣之君山即在嶧縣界中與東沭河合遂南入宿遷境今為運道其流甚盛而東沭河源出費縣山中或云出榜山蓋即今芙蓉湖其流稍短然則西沭河即漢志冠石山之治水無疑總與東萊曲成出陽邱山之治水無與也

陽縣故城東縣故鄆國也春秋左傳昭公十八年邾人

襲鄆盡俘以歸鄆子曰余無歸矣從帑于邾是也後更

名開陽矣春秋哀公三年經書季孫斯叔孫州仇帥師

城啟陽者是矣縣故瑯邪郡治也

又東過襄賁縣東屈從縣西南流又屈南過郯縣西

魯連子稱陸子謂齊湣王曰魯費之衆臣甲舍于襄賁

者也王莽更名章信也郯故國也少昊之後春秋昭公

十七年郯子朝魯公與之宴昭子叔孫婁一清按三字注中注問

曰少昊鳥名官何也郯子曰吾祖也我知之黃帝炎帝

以雲火紀官太皞以龍紀少皞瑞鳳鳥統歷鳥官之司

議政斯在孔子從而學焉既而告人曰天子失官學在

四夷者也竹書紀年晉烈公四年一清按竹書是晉烈公六年當周威烈王

之十年越子朱句滅郟以郟子鳩歸縣故舊魯也東海郡
 治秦始皇以為郟郡漢高帝二年更從今名全氏曰按
而秦已有東海郡治郟史記陳涉世家云 郟非秦郡
圍東海守慶于郟是也此蓋承應劭之誤 卽王莽之沂
 平者也

又南過良城縣西又南過下邳縣西南入于泗

春秋左傳曰昭公十三年秋晉侯會吳子于良吳子辭
 水道不可以行晉乃還是也地理志曰良城王莽更名
 承翰矣沂水於下邳縣北西流分爲二水一水於城北
 西南入泗一水逕城東屈從縣南亦注泗謂之小沂水
 水上有橋徐泗間以為圯昔張子房遇黃石公于圯上

卽此處也建安二年曹操圍呂布於此引沂泗灌城而
 擒之

洙水出泰山蓋縣臨樂山

地理志曰臨樂山洙水所出西北至蓋入泗水或作池

字蓋字誤也一清按八 洙水自山西北逕蓋縣漢景帝

中五年封后兄王信爲侯國又西逕泰山東平陽縣春
 秋宣公八年冬城平陽杜預曰今泰山平陽縣是也河
 東有平陽故此加東矣晉武帝元康九年改爲新泰縣
 也

西南至卞縣入于泗

洙水西南流盜泉水注之泉出卞城東北卞山之陰尸
 子曰孔子至于勝母暮矣而不宿于盜泉渴矣而不飲
 惡其名也故論撰考識曰水名盜泉仲尼不漱卽斯泉
 矣西北流注于洙水洙水又西南流于卞城西而與泗
 水亂流西南至魯縣東北又分爲二水水側有故城兩
 水之分會也洙水西北流逕孔里北是謂洙泗之間矣
 春秋之浚洙非謂始導矣蓋深廣之耳洙水又西南枝
 津出焉又南逕瑕邱城東而南入石門門右結石爲水
 門跨於水上也西南流世謂之杜武溝洙水又西南逕
 南平陽縣之顯閭亭西邾邑也春秋襄公二十一年經

書邾庶其以漆閭邱來奔者也杜預曰平陽北有顯閭
 亭十三州記曰山陽南平陽縣又有閭邱鄉從征記曰
 杜謂顯閭邱也今按漆鄉在縣東北漆鄉東北十里見
 有閭邱鄉顯閭非也然則顯閭自是別亭未知孰是又
 南洙水注之呂忱曰洙水出東平陽上承汶水於岡縣
 西闡亭東爾雅曰汶別爲闡其由洛之有波矣洙水西
 南流逕盛鄉城西京相璠曰岡縣西南有盛鄉城者也
 又南逕泰山寧陽縣故城西漢武帝元朔三年封魯共

王子劉恬爲侯國一清按史表恬作恢索隱曰表在濟南今漢表無濟南字地理志泰山郡
 寧陽縣曰侯國是也王莽改之曰寧順也又南洙水枝津注之水

首受洸水西南流逕瑕邱城北又西逕寧陽城南又西南入于洸水洸水又西南逕泰山郡乘邱縣故城東趙

肅侯二十年韓將舉與齊魏戰于乘邱一清按史記趙世家肅侯二十

三年韓舉與齊魏戰死于桑邱裴駢集解引地理志云泰山有桑邱縣今漢志是桑邱桑乘字形相近致訛又

韓世家宣惠王八年魏敗我將韓舉六國年表同韓宣惠王之八年乃周烈王之四十四年實趙武靈王之元

年也去肅侯之二十三年事隔兩朝年歷三週舉為趙將前已敗死又復為韓將以與魏戰可怪也是以徐廣

曰韓將夫韓將而何以書于趙世家乎索隱曰舉是韓將而紀年云趙將蓋舉本趙將後入韓此亦為史遷作

調人耳考之紀年則又不合當周威烈王之十六年正晉烈公之十年齊田辟與邯鄲韓舉戰于平邑獲韓舉

然則舉是趙將稍可據其時韓武子趙獻侯田齊宣公耳年數相去八十六年之久舛錯如此索隱引紀年云其敗當韓威王八年是即此縣也漢武帝元朔五年封不同也而韓又無威王

中山靖王子劉將夜為侯國也一清按史表作桑邱侯表作乘邱無深澤字蓋桑乘字相似然中山之封何以

在魯宋之郊蓋善長所見之漢書已脫誤矣今直隸安肅縣西南有桑邱城安肅本漢中山國北

新城地將夜之封宜在彼而此則非也洸水又東南

流注于洸水又南至高平縣南入于泗水西有茅鄉

城東去高平三十里京相璠曰今高平縣西三十里有

故茅鄉城者也

水經注釋卷二十五終

